



REPUBLIKA E SHQIPËRISË

MINISTRI

Nr. _____ prot.

Tiranë, më _____.____.2026

PROJEKT- UDHËZIM

Nr. _____, datë _____.____.2026

MBI RREGULLAT E HOLLËSISHME PËR PRODHIMIN ORGANIK TË BIMËVE DHE PRODUKTEVE BIMORE, MATERIALIT RIPRODHUES BIMOR, MBLEDHJEN E BIMËVE TË EGRA DHE PRODHIMIN E KËRPUDHAVE.

Në mbështetje të nenit 102, pika 4, të Kushtetutës, pikës 10 të nenit 13, të ligjit nr. 104/2024 “Për prodhimin organik, etiketimin e produkteve organike dhe kontrollin e tyre”,

UDHËZOJ:

KREU I

DISPOZITA TË PËRGJITHSHME

Neni 1

Qëllimi

Ky udhëzim ka për qëllim të përcaktojë rregullat e hollësishme lidhur me:

- a) prodhimin organik të bimëve dhe produkteve bimore pëfshirë materialin riprodhues bimor;
- b) kalimin e prodhimit bimor në prodhim organik;
- c) përjashtimet nga rregullat e prodhimit bimor organik;

- ç) prodhimin e kërpudhave organike;
- d) mbledhjen e bimëve të egra organike.

Neni 2

Përkufizimet

1. Të gjitha termat e përcaktuara në këtë udhëzim kanë të njëjtin kuptim me ata të përcaktur në ligjin nr.104/2024 “Për prodhimin organik, etiketimin e produkteve organike dhe kontrollin e tyre“, në vijim ligji.

2. Për efekt të këtij udhëzimi termat e mëposhtëm kanë këto kuptime:

- a) “Lëndë e parë bujqësore”, është një produkt bujqësor që nuk i është nënshtruar asnjë procesi ruajtje ose përpunimi.
- b) “Sipërfaqe bujqësore”, ka kuptimin e dhënë në legjislacionin në fuqi për bujqësinë dhe zhvillimin rural.
- c) Përgatitjet biodinamike, janë përzierje që përdoren tradicionalisht në bujqësinë biodinamike.
- ç) “Kultivimi i kulturave të lidhura me tokën“, është prodhimi në tokë natyrore ose në tokë të plehëruar me produkte dhe substanca që përdoren në prodhimin organik, në varësi të përbërjes së tokës dhe shkëmbit amnor.
- d) “Biofumigimi”, është një praktikë agroteknike që konsiston në mbjelljen, prerjen dhe futjen në tokë të bimëve të caktuara, të cilat gjatë procesit të dekompozimit çlirojnë substanca biologjike aktive me efekt toksik ndaj patogjenëve, nematodave dhe dëmtuesve të tokës. Kjo metodë përbën një alternativë ekologjike ndaj përdorimit të pesticideve kimike për dezinfektimin e tokës.
- e) “Solarizimi i tokës”, është një metodë agroteknike e dezinfektimit natyral të tokës, e cila konsiston në mbulimin e tokës së lagur me plastikë transparente gjatë periudhave të nxehta, me qëllim rritjen e temperaturës së tokës në nivele që eliminojnë patogjenët, farat e barërave të këqija dhe insektet në shtresat sipërfaqësore të tokës.

KREU II - RREGULLAT E PRODHIMIT ORGANIK BIMOR

Neni 3

Rregullat e prodhimit organik bimor

1. Operatori i prodhimit organik bimor, përveç rregullave të përgjithshme të prodhimit të përcaktuara në nenet 9 deri në 12 të ligjit, plotëson edhe rregullat e përcaktuara në këtë udhëzim.

2. Në përjashtim nga pika 2 e nenit 13 të ligjit, lejohet:

a) prodhimi i farave të mbira të cilat nuk janë rritur në tokë por në kontenier me ujë dhe mjedis inert, ku përfshihen filizat, lastarët dhe lakërishtet që rriten vetëm me rezervat ushqyese që gjenden në fara, duke i lagur në ujë të pastër, me kusht që farat të jenë organike. Ndalohet përdorimi i mjedisit të rritjes, përveç rastit të përdorimit të një mjedisi inert për mbajtjen e farave me lagështi, kur përbërësit e tij përfshihen në listen e përcaktuar në pikën 4 të nenit 21 të ligjit.

b) përftimi i kokave të çikores, duke përfshirë zhytjen e tyre në ujë të pastër, me kusht që materiali riprodhues bimor të jetë organik. Përdorimi i një mjedisi rritje lejohet vetëm kur përbërësit e tij përfshihen në listën e përcaktuar në pikën 4 të nenit 21 të ligjit.

3. Në përjashtim nga pika 2 e nenit 13 të ligjit, lejohen praktikat e mëposhtme:

a) Rritja e bimëve në vazo ose kontenierë për prodhimin e bimëve zbukuruese dhe erëzave që shiten bashkë me vazo tek konsumatori i fundit.

b) Rritja e fidanëve ose e transplantëve në kontenierë për transplantim të mëtejshëm.

Neni 4

Periudha e kalimit

1. Bimët dhe produktet bimore konsiderohen organike, kur në parcelat e prodhimit të tyre zbatohen rregullat e prodhimit të përcaktuara në ligj dhe në këtë udhëzim, gjatë një periudhe kalimi, të paktën dy vjet para mbjelljes, ose në rastin e kullotave ose foragjereve shumëvjeçare, të paktën dy vjet para përdorimit të tyre si ushqim për kafshë, organik nga fermat organike, ose në rastin e kulturave shumëvjeçare përveç foragjereve, të paktën tre vjet para vjeljes së parë të produkteve organike.

2. Kur toka ose një ose më shumë parcela të saj, janë ndotur me produkte ose substanca që nuk përdoren në prodhimin organik, trupa e kontrollit mund të zgjasë periudhën e kalimit përtej

periudhës së përcaktuar në pikën 1 të këtij neni dhe njofton autoritetin kompetent të kontrollit zyrtar në fermë.

3. Në rastin kur parcelat organike ose në kalim, janë trajtuar me një produkt që nuk përdoret në prodhimin organik, trupa e kontrollit kërkon një periudhë të re kalimi në përputhje me pikën 1, të këtij neni dhe njofton autoritetin kompetent të kontrollit zyrtar në fermë.

a) Kjo periudhë mund të reduktohet në rastet e mëposhtme:

- i) trajtimi me një produkt ose substancë që nuk përdoret në prodhimin organik, është miratuar nga autoriteti kompetent për mbrojtjen e bimëve, si pjesë e masave të detyrueshme për kontrollin e dëmtuesve ose barërave të këqija, përfshirë organizmat karantinorë ose speciet invazive.
- ii) trajtimi me një produkt ose substancë që nuk përdoret në prodhimin organik, është miratuar nga autoriteti kompetent për mbrojtjen e bimëve, si pjesë e testimeve shkencore.

4. Në rastet e përcaktuara në pikat 2 dhe 3 të këtij neni, kohëzgjatja e periudhës së kalimit përcaktohet duke marrë parasysh kërkesat e mëposhtme:

a) procesi i degradimit të produkteve ose substancave të përdorura të garantojë, në fund të periudhës së kalimit, një nivel të papërfillshëm mbetjesh në tokë dhe, në rastin e një kulture shumëvjeçare në bimë.

b) Prodhimi i vjelë pas trajtimit nuk vendoset në treg si produkt organik ose në kalim.

5. Në rastin e trajtimit me një produkt që nuk përdoret në prodhimin organik, nuk zbatohet shkronja “b” e pikës 6 të këtij neni.

6. Në rastin e tokës së shoqëruar me prodhimin blegtoral organik:

a) rregullat e kalimit zbatohen për të gjithë sipërfaqen e njësisë së prodhimit të ushqimit për kafshë;

b) pavarësisht nga shkronja “a” e kësaj pike, periudha e kalimit mund të reduktohet në një vit për kullotat dhe sipërfaqet e hapura të përdorura nga speciet jobarngrënëse.

Neni 5

Përdorimi i materialit mbjelles dhe riprodhues bimor në kalim dhe jo organik

1. Në përjashtim nga pika 5 e nenit 13, të ligjit, kur të dhënat, në database të e përcaktuar në pikën 1, të nenit 8 të këtij udhëzimi dhe sistemin sipas shkronjës “a” të pikës 2, të nenit 24 të ligjit, tregojnë se nuk plotësohen nevojat cilësore dhe sasiore të operatorit për material riprodhuesriprodhues bimor organik, operatori mund të përdorë material riprodhuesriprodhues

bimor në kalim në përputhje me shkronjën “a” të pikës 4 të nenit 10, të ligjit ose material riprodhuesriprodhuesbimor jo organik të miratuar në përputhje me nenin 10, të këtij udhëzimi.

2. Përveç kësaj, në rast të mungesës së gjendjes për tregtim të fidanëve organikë, 'fidanët në kalim', të tregtuara në përputhje me shkronjën “a” të pikës 4 të nenit 10 të ligjit, mund të përdoren kur rriten:

a) përmes një cikli kultivimi nga fara në fidanin përfundimtar që zgjat të paktën 12 muaj, në një parcelë toke, që gjatë së njëjtës periudhë ka përfunduar një periudhë kalimi të paktën 12 muaj; ose

b) në një parcelë toke organike ose në kalim, ose në kontenierë sipas përjashtimit të përcaktuar në pikën 3 të nenit 3 të këtij udhëzimi, me kusht që fidani të ketë origjinën nga fara në kalim, e korrur nga një bimë e rritur në një parcelë toke që ka përfunduar një periudhë kalimi prej të paktën 12 muaj.

3. Kur materiali mbjellës dhe riprodhues bimor organik ose në kalim ose materiali mbjellës dhe riprodhues bimor i miratuar për përdorim sipas nenit 10, të këtij udhëzimi nuk është i disponueshëm në cilësi ose sasi të mjaftueshme për të përmbushur nevojat e operatorit, trupa e kontrollit miraton përdorimin e materialit riprodhuesriprodhues bimor jo organik, sipas nenit 6 deri në nenin 9, të këtij udhëzimi.

4. Një miratim i tillë individual jepet vetëm në një nga rastet e mëposhtme:

a) kur asnjë varietet i llojit të bimës që operatori dëshiron të prodhojë ose ekuivalent me të, nuk gjendet në database të përcaktuar në pikën 1 të nenit 8 të këtij udhëzimi ose në sistemin e përcaktuar në shkronjën “a” të pikës 2 të nenit 24 të ligjit;

b) kur asnjë operator që tregon material riprodhuesriprodhues bimor nuk mund të ofrojë materialin riprodhuesriprodhues bimor organik ose në kalim ose materialin riprodhuesriprodhues bimor të miratuar për përdorim në përputhje me nenin 10, të këtij udhëzimi, në kohë për mbjellje ose transplantim, në raste kur përdoruesi ka bërë porosinë me kontratë të materialit riprodhuesriprodhues bimor, brenda një kohe të arsyeshme për të mundësuar përgatitjen dhe furnizimin e materialit riprodhuesriprodhues bimor organik ose në kalim, ose të miratuar në përputhje me nenin 10 të këtij udhëzimi.

c) kur varieteti që operatori dëshiron të prodhojë nuk është regjistruar si material mbjellës dhe riprodhues bimor organik ose në kalim, ose si material mbjellës dhe riprodhues bimor i miratuar për përdorim në përputhje me nenin 10, të këtij udhëzimi, në databaseregjistrin sipas pikës 1 të nenit 8 të këtij udhëzimi ose sistemin sipas shkronjës “a” të pikës 2, të nenit 24, të ligjit, dhe operatori është në gjendje të dëshmojë se asnjë nga alternativat e regjistruara/listuara ose vetëdeklaruarat të të njëjtit lloj nuk është e përshtatshme, veçanërisht për kushtet agroteknike dhe pedo-klimatike, si dhe për tiparet teknologjike të nevojshme për prodhimin që synohet të arrihet.

ç) kur justifikohet përdorimi për kërkime, testime në fushë në shkallë eksperimentale ose për qëllime të ruajtjes së varieteteve të përcaktuara nga autoriteti kompetent për materialin mbjellës dhe riprodhues bimor.

5. Përpara aplikimit për një miratim të tillë, operatori duhet të verifikojë në database/regjistrin sipas pikës 1, të nenit 8 të këtij udhëzimi ose sistemin sipas shkronjës “a” të pikës 2 të nenit 24 të ligjit, nëse gjendet materiali mbjellës dhe riprodhues bimor organik ose në kalim ose materiali mbjellës dhe riprodhues bimor i miratuar për përdorim në përputhje me nenin 10 të këtij udhëzimi, dhe nëse kërkesa e tyre është e justifikuar.

6. Në përputhje me shkronjën “f” të nenit 6 të ligjit, operatorët mund të përdorin material mbjellës dhe riprodhues bimor organik dhe në kalim nga fermat e tyre, pavarësisht gjendjes cilësore dhe sasiore të varieteteve nga database sipas pikës 1, të nenit 8 të këtij udhëzimi dhe sistemi sipas shkronjës “a” të pikës 2 të nenit 24 të ligjit.

Neni 6

Trajtimi i materialit mbjellës dhe riprodhues bimor jo-organik

1. Materiali mbjellës dhe riprodhues bimor jo-organik nuk duhet të trajtohet pas korrjes me produkte për mbrojtjen e bimëve, përveç atyre që përdoren për trajtimin e materialit mbjellës dhe riprodhues bimor të përcaktuara në pikën 4 të nenit 21 të ligjit, përveç rasteve kur trajtimi kimik është miratuar nga autoriteti kompetent për mbrojtjen e bimeve për qëllime fitosanitare, për të gjitha varietetet dhe materialet heterogjene të një lloji të dhënë në zonat ku materiali mbjellës dhe riprodhues bimor do të përdoret.

2. Kur përdoret materiali mbjellës dhe riprodhues bimor jo-organik i trajtuar siç përcaktohet në pikën 1, parcela në të cilën kultivohet ky material mbjellës dhe riprodhues bimor, i nënshtrohet, një periudhe kalimi siç përcaktohet në pikën 3 dhe 4 të nenit 4 të këtij udhëzimi.

Neni 7

Miratimi për përdorim të materialit mbjellës dhe riprodhues bimor jo organik

1. Miratimi për përdorimin e materialit mbjellës dhe riprodhues bimor jo organik, merret para mbjelljes së kulturës bujqësore.

2. Miratimi nga trupa e kontrollit për përdorimin e materialit mbjellës dhe riprodhues bimor jo organik, jepet për çdo përdorues individual një herë në sezon dhe trupa e kontrollit mban regjistra për sasi të materialit mbjellës dhe riprodhues bimor të miratuar.

Neni 8

Lista zyrtare e materialit riprodhues bimor organik ose në kalim (regjistrimi)

1. Institucioni përgjegjës për farat dhe fidanët, krijon dhe përditëson rregullisht një database, për të listuar materialin riprodhues bimor organik ose në kalim, përfshirë farat e patates dhe përjashtuar fidanët, të cilat gjenden në teritorin e republikës së shqipërisë.

2. Institucioni përgjegjës për farat dhe fidana, krijon një listë zyrtare të specieve nënspecieve ose varieteteve për të cilat materiali riprodhues bimor organik ose në kalim gjendet në sasi dhe varietete të mjaftueshme, në teritorin e republikës së shqipërisë.

Për këto specie nënspecie ose varietete që përfshihen në këtë listë, nuk mund të miratohet asnjë përjashtim sipas nenit 5 të këtij udhëzimi për të përdorur material mbjellës dhe riprodhues bimor jo organik, përveç rastit të shkronjës “d” të pikës 4, të nenit 5, të këtij udhëzimi, e cila duhet të justifikohet.

3. Nëse sasia ose cilësia e materialit riprodhues bimor organik ose në kalim i disponueshëm për një specie, nënspecie ose varietet të listës, rezulton të jetë e pamjaftueshme ose e papërshtatshme, për shkak të rrethanave të caktuara të jashtëzakonshme, institucioni përgjegjës për farat dhe fidanët, heq specien, nënspecien ose varietetin nga lista.

4. Institucioni përgjegjës për farat dhe fidanët, publikon listën e përditësuar sipas pikës 3, të këtij neni, në faqen zyrtare.

Neni 9

Miratimi i përgjithshëm

1. Në përjashtim të pikës 2 të nenit 7, të këtij udhëzimi, trupa e kontrollit mund të miratojë një përjashtim të përgjithshëm, vjetor për të gjithë operatorët e interesuar për përdorimin e:

a) një specie ose nënspecie të caktuar, kur asnjë varietet i tyre nuk gjendet në database/regjistrin e përcaktuar në pikën 1, të nenit 8 të këtij udhëzimi ose në sistemin sipas shkronjës “a” të pikës 2, të nenit 24 të ligjit;

b) një varieteti të caktuar kur plotësohen kushtet e përcaktuara në shkronjën “c” të pikës 4 të nenit 5, të këtij udhëzimi.

2. Kur përdoret një miratim i përgjithshëm, operatorët mbajnë regjistra të sasisë së përdorur dhe trupa e kontrollit mban listën me sasi të materialit mbjellës dhe riprodhues bimor jo-organik të miratuar.

3. Trupa e kontrollit njofton institucionin përgjegjës për farat dhe fidanet, për miratimin e përgjithshëm për përdorimin e një specie, nënspecie ose varieteti të caktuar.
4. Institucioni përgjegjës për farat dhe fidanët shton në databaser/regjistër e përcaktuar në pikën 1, të nenit 8, speciet, nënspeciet ose varietetet për të cilat është dhënë një miratim i përgjithshëm për përdorim, dhe e publikon në faqen zyrtare.
5. Trupa e kontrollit nuk miraton përjashtimin për përdorimin e fidanëve jo organikë, në rastin e fidanëve të llojeve që kanë një cikël kultivimi të përfunduar brenda një sezoni rritje, që nga mbjellja e fidanit deri në vjeljen e parë të produktit.

Neni 10

Prodhimi i materialit mbjellës dhe riprodhues bimor organik

1. Trupa e kontrollit miraton që operatorët që prodhojnë material mbjellës dhe riprodhues bimor organik të përdorin material mbjellës dhe riprodhues bimor jo-organik, kur bimët mëmë ose bimë të tjera që përdoren për prodhimin e materialit mbjellës dhe riprodhues bimor në përputhje me pikën 6 të nenit 13 të ligjit, nuk gjenden në sasi dhe cilësi. Ky material mbjellës dhe riprodhues bimor i prodhuar vendoset në treg si organik me kusht që të plotësohen kushtet e mëposhtme:
 - a) materiali mbjellës dhe riprodhues bimor jo-organik i përdorur nuk duhet të jetë trajtuar pas korrjes me produkte për mbrojtjen e bimëve, përveç atyre që përdoren në prodhimin organik në përputhje me pikën 4 të nenit 21 të ligjit, përveç rasteve, kur trajtimi kimik është parashikuar në legjislacionin në fuqi për mbrojtjen e bimëve për qëllime fitosanitare për të gjitha varietetet dhe materialin heterogjen të një specje të caktuar në sipërfaqen ku përdoret materiali mbjellës dhe riprodhues bimor. Kur përdoret material mbjellës dhe riprodhues bimor jo-organik i trajtuar, parcela e tokës në të cilën materiali mbjellës dhe riprodhues bimor kultivohet, i nënshtrohet një periudhe kalimi, në përputhje me pikën 3 dhe 4 të nenit 4 të këtij udhëzimi.
 - b) materiali mbjellës dhe riprodhues bimor jo-organik i përdorur nuk është fidan i specieve me cikël kultivimi që përfundon brenda një sezoni rritjeje, nga mbjellja e fidanit deri në vjeljen e parë të tij.
 - c) materiali mbjellës dhe riprodhues bimor është prodhuar në përputhje me të gjitha kërkesat e tjera të prodhimit bimor organik të përcaktuara në ligj dhe në këtë udhëzim;
 - ç) miratimi nga trupa e kontrollit për të përdorur material mbjellës dhe riprodhues bimor jo organik jepet përpara mbjelljes së farës ose fidanit në tokë;
 - d) trupa e kontrollit miraton përdorimin e materialit mbjellës dhe riprodhues bimor jo organik për përdoruesit individual një herë në sezon, dhe mban të dhëna për sasinë e materialit mbjellës dhe riprodhues bimor të miratuar për përdorim;

dh) në përjashtim nga pika “d”, trupa e kontrollit mund të leshojë miratim të përgjithshëm çdo vit për përdorimin e një specije, nënspecie ose varieteti të materialit mbjellës dhe riprodhues bimor jo organik dhe njofton institucioni përgjegjës për farat dhe fidanët e cila publikon listën e specieve, nënspecieve ose varieteteve duke e përditësuar çdo vit. Në këtë rast, institucioni përgjegjës për farat dhe fidanët liston edhe sasinë e miratuar për përdorim të materialit mbjellës dhe riprodhues bimor jo organik.

2. Operatorët që prodhojnë dhe tregtojnë material mbjellës dhe riprodhues bimor të prodhuar në përputhje me pikën 1, mund të bëjnë publike, mbi baza vullnetare, informacionin specifik përkatës mbi gjendjen për tregtim të këtij materiali mbjellës dhe riprodhues bimor në sistemin elektronik të ministrisë sipas shkronjës “a”, të pikës 2, të nenit 24 të ligjit. Operatorët që zgjedhin të përfshijnë një informacion të tillë duhet të sigurojnë që informacioni të përditësohet rregullisht dhe të hiqet kur materiali mbjellës dhe riprodhues bimor nuk rezulton i disponueshëm. Kur është dhënë një miratim i përgjithshëm sipas shkronjës “dh”, të pikës 1 të këtij neni, operatorët mbajnë shënime për sasinë e përdorur.

KREU III - MENAXHIMI I TOKËS , DËMTUESVE DHE BARËRAVE TË KËQIJA DHE PLEHËRIMI

Neni 11

Menaxhimi i tokës dhe plehërimi

1. Në prodhimin organik bimor, praktikat e punimit të tokës dhe kultivimit përdoren në mënyrë të tillë që të ruajnë ose rrisin lëndën organike në tokë, të përmirësojnë stabilitetin e tokës dhe biodiversitetin e saj dhe të parandalojnë shtypjen dhe erozionin e tokës.

2. Pjelloria dhe aktiviteti biologjik i tokës duhet të ruhet dhe të rritet:

a) përveç kullotave ose foragjerëve shumëvjeçarë, nëpërmjet përdorimit të rotacionit shumëvjeçar të kulturave, duke përfshirë përdorimin e detyrueshëm të legumeve si kulturë kryesore ose mbuluese për rotacionin e kulturave dhe kultura të tjera për plehërim të gjelbër;

b) në rastin e serave ose kulturave shumëvjeçare, përveç foragjerëve, nëpërmjet përdorimit të kulturave për plehërim të gjelbër afatshkurtër dhe legumet, si dhe përdorimit të diversitetit bimor;

c) dhe në të gjitha rastet, nëpërmjet aplikimit të plehut organik ose lëndës organike, nga prodhimi organik i kompostuar.

3. Kur nevojat ushqyese të bimëve nuk plotësohen me masat e parashikuara në pikën 1 dhe 2 të këtij neni, përdoren vetëm plehra dhe përmirësuesit e tokës të përcaktuar në pikën 4 të nenit 21 të ligjit. Operatorët mbajnë të dhëna për përdorimin e këtyre produkteve, përfshirë datën ose datat në

të cilat është përdorur secili produkt, emrin e produktit, sasinë e përdorur, kulturat bujqësore dhe parcelat ku përdoren.

4. Sasia totale e plehut organik nga kafshët, e përdorur në njësitë e prodhimit në kalim dhe organik nuk kalon 170 kg azot në vit për hektar të sipërfaqes bujqësore të përdorur. Ky kufizim përdoret vetëm për përdorimin e plehut organik të fermes, të plehut të thatë të fermës, të plehut të dehidruar të shpendëve, jashtëqitjet e kafshëve të kompostuara, përfshirë plehun e shpendëve, plehun e fermës së kompostuar dhe jashtëqitjet e lëngshme të kafshëve.

5. Fermat e prodhimit organik lidhin kontratë me fermat e tjera organike, me qëllim shpërndarjen e plehut të tepërt nga prodhimi organik. Kufiri maksimal i përmendur në pikën 4 të këtij neni, llogaritet duke marrë parasysh sipërfaqen totale të fermave të kontraktuara.

6. Përgatitjet e mikroorganizmave përdoren për të përmirësuar gjendjen e përgjithshme të tokës ose për të përmirësuar disponueshmërinë e lëndëve ushqyese në tokë ose në të korra.

7. Për aktivizimin e procesit të kompostimit të plehut organik përdoren përgatitje të përshtatshme me bazë bimore dhe preparate mikrobiologjike.

8. Produktet plehëruese minerale të azotit nuk përdoren.

9. Lejohet përdorimi i përgatitjeve biodinamike.

Neni 12

Menaxhimi i dëmtuesve dhe barërave të këqija

1. Parandalimi i dëmeve të shkaktuara nga dëmtuesit dhe barërat e këqija kryhet nëpërmjet:

- armiqve natyrorë,

- zgjedhjes së specieve, varieteteve dhe materialit heterogjen,

- rotacionit bujqësor

- teknikave të kultivimit si bioinsekte biofumigimi, metodat mekanike dhe fizike, dhe

- proceset termike të tilla si solarizimi dhe, në rastin e kulturave të mbrojtura në sera, trajtimi i cekët me avull i tokës (në një thellësi maksimale prej 10 cm).

2. Kur bimët nuk mund të mbrohen në mënyrë të mjaftueshme nga dëmtuesit me masat e parashikuara në pikën 1 të këtij neni ose në rastin e një kërcënimi të shfaqur për një kulturë, përdoren vetëm produktet dhe substancat e përcaktuara në pikën 4 të nenit 21 të ligjit. Operatorët

mbajnë të dhëna për përdorimin e këtyre produkteve, duke përfshirë datën ose datat e përdorimit emrin e produktit, substancat aktive, sasinë e aplikuar, kulturat dhe parcelat në të cilat përdoren, si dhe dëmtuesit ose sëmundjet që do të kontrollohen.

3. Për produktet dhe substancat që përdoren në kurthe ose në metoda çorientuese, përveç ferromoneve, kurthet dhe/ose metodat çorientuese duhet të parandalojnë çlirimin e substancave të ndaluara në mjedis dhe kontaktin e produkteve të përdorura me bimët e kultivuara. Kurthet, pas përdorimit, mblidhen dhe hidhen në vende të caktuara të riciklimit, për të shmangur mundësinë e përhapjes së tyre.

Neni 13

Produktet e lejuara për pastrim dhe dezinfektim

Në prodhim organik bimor përdoren vetëm produktet për pastrim dhe dezinfektim të përcaktuara në pikën 4, të nenit 21 të ligjit. Operatorët mbajnë të dhëna për përdorimin e këtyre produkteve duke përfshirë datën ose datat e përdorimit, emrin e produktit, substancat aktive dhe vendin ku përdoren.

Neni 14

Mbajtja e regjistrave

Operatorët mbajnë të dhëna në lidhje me parcelat dhe sasinë e të korrave. Në veçanti, operatorët mbajnë të dhëna për çdo input tjetër të jashtëm të përdorur në çdo parcel dhe, kur është e zbatueshme, mbajnë dokumentacionin përkatës për çdo përjashtim nga rregullat e prodhimit të miratuara në përputhje me nenet 5 deri 10 të këtij udhëzimi.

KREU IV - PËRGATITJA E PRODUKTEVE TË PAPËRPUNUARA

Neni 15

Përgatitja e produkteve të papërpunuara

Nëse në bimë kryhen veprime përgatitore të tjera përveç përpunimit, zbatohen kërkesat e përgjithshme për prodhimin e produkteve ushqimore të përpunuara organike të përcaktuara në pikën 6 të nenit 16 të ligjit.

Neni 16

Rregullat për prodhimin e kërpudhave

Për prodhimin e kërpudhave, përdoren vetëm substratet që përmbajnë përbërësit e mëposhtëm:

a) plehun organik të fermës dhe jashtëqitjet e kafshëve:

i) nga njësitë e prodhimit organik ose në kalim në vitin e dytë të kalimit; ose

ii) referuar pikës 3 të nenit 11 të këtij udhëzimi, vetëm kur produkti sipas shkronjës “i” të kësaj pike, nuk është i disponueshëm, me kusht që plehu i fermës dhe jashtëqitjet e kafshëve të mos kalojnë 25% të peshës totale të përbërësve të substraktit, përjashtuar materialin mbulues të kompostimit dhe ujin e shtuar para kompostimit të plehrave;

b) produktet me origjinë bujqësore, të ndryshme nga ato të përmendura në shkronjën “a”, të kësaj pike, nga njësitë e prodhimit organik;

c) torfë që nuk është trajtuar kimikisht;

d) dru që nuk është trajtuar me produkte kimike pas prerjes;

e) produktet minerale sipas pikës 3 të nenit 11 të këtij udhëzimi, ujin dhe tokën.

Neni 17

Rregullat për mbledhjen e bimëve të egra

1. Mbledhja e bimëve të egra dhe pjesëve të tyre që rriten në mënyrë natyrore në zona natyrore, pyje dhe zona bujqësore konsiderohet si prodhim organik, me kusht që:

a) këto zona nuk janë trajtuar me produkte të tjera, përveç atyre të përcaktuara në pikën 4 të nenit 21 të ligjit, për një periudhë të paktën tre vjetare para mbledhjes.

b) aktiviteti i mbledhjes nuk ndikon në qëndrueshmërinë e habitatit natyror ose në ruajtjen e specieve/llojit në zonën e mbledhjes.

2. Operatorët mbajnë të dhëna për periudhën dhe vendndodhjen e mbledhjes, speciet dhe sasinë e bimëve të egra të mbledhura.

Neni 18

DISPOZITA KALIMTARE DHE TË FUNDIT

Rregullat përjashtimore lidhur me fidanet dhe materialet e tjera mbjelles dhe shumezues bimor të përcaktuara në pikën 1 të nenit 10, zbatohen deri me 31 dhjetor 2036.

Neni 19

Dispozitat e Fundit

Ngarkohen Ministria e Bujqësisë dhe Zhvillimit Rural, trupat e kontrollit, autoritetet kompetente të kontrollit zyrtar në fermë dhe të ushqimit dhe ushqimit për kafshë dhe institucioni përgjegjës për farat dhe fidanët, për zbatimin e këtij udhëzimi.

Neni 20

Hyrja në fuqi

Ky udhëzim hyn në fuqi pas botimit në Fletoren Zyrtare dhe i fillon efektet më datë 29 tetor 2026.

MINISTRI

ANDIS SALLA